

三經同卷

佛說貝多樹下思惟十二因緣經

良八

佛說緣起聖道經

佛說稻稈經

佛說貝多樹下思惟十二因緣經良八 亦名聞滅 十二因緣

吳月支國優婆塞支謙譯

聞如是一時佛在舍衛國止祇樹給孤獨園
是時佛告比丘比丘便應唯然比丘從佛聽
佛便說言諸比丘我本未得佛道為菩薩時

為念是咄是世間極劇為生老死為往受但
苦當何時從老死得要也諸比丘便自思惟
得是意何以故有老死亦何因緣復老死比
丘便念本得應意生故為有老死亦生因緣
復老死比丘便思惟念何以故為生亦何因
緣復生比丘便自思惟案本念便得是應意
為有故生亦因緣有復生比丘便思惟生是
意何以故為有有亦何因緣復有比丘便思
惟案本念便生應是意為受故有有亦受因
緣復有比丘便思惟是何以故受有亦何因

緣復受比丘便案本念得是應意爲愛故受
亦愛因緣復受比丘便思惟念何以故爲愛
有亦何因緣復愛比丘便思惟案本念得要
痛樂故愛亦痛樂因緣復愛比丘便思惟念
何以痛樂有亦何因緣痛樂復有比丘便思
惟案本念得是應意更故痛樂有亦更因緣
痛樂復痛樂比丘便思惟念何以故有更亦
何因緣復更比丘便思惟案本念便生應意
六入故有更亦六入因緣復更比丘便思惟
念何以故有六入亦何因緣復有六入比丘

便思惟案本念得是應意名像故有六入亦
名像因緣復有六入比丘便思惟念何以故
名像有亦何因緣復有名像比丘便思惟案
本念得是應意識故爲名像有亦識因緣復
有名像比丘便思惟念何以故有識亦何因
緣復識比丘便思惟案本念有是應意名像
故爲有識亦名像因緣復識比丘便思惟生
是意是何等咄是識還不復前在名像因緣
識亦識因緣名像名像因緣六入六入因緣
更更因緣痛痛因緣愛愛因緣受受因緣有

有因緣生生因緣老死憂哭苦不可意愁從是致有如是但爲從五陰一切苦從習生比丘便自思惟念何以故無有老死亦何故老死滅盡比丘便案本念思惟得是應可意無有生亦不老死已生盡老死亦盡比丘便自思惟念何以故不復生亦何因緣復生盡比丘便思惟案本念生是應意有無有是有者便不復生有盡復生盡比丘便思惟念何等無有爲有無有何等盡爲復有盡諸比丘便思惟案本念自生應意受無有便有無有受

已盡便有盡諸比丘便思惟念何等無有令受無有亦何等盡令受盡諸比丘便思惟案本念得應意無有愛亦無有受愛已盡便受盡諸比丘便思惟念何等無有爲愛無有何盡復是愛盡諸比丘便思惟案本念意生如應痛痒無有便愛無有痛痒盡則愛盡諸比丘便思惟念何等無有則痛痒無有何等盡是痛痒盡便自思惟案本念得是應意更樂無有則痛痒無有更樂盡復痛痒盡便復思惟念何等無有更樂無有何等盡是更樂盡

便復思惟念本得應意六入無有即更樂無有六入盡復更樂盡便復思惟念何等無有六入無有何等盡則六入盡便復思惟案本念有是應意名像無有則六入無有名像盡復六入盡便復思惟念何等無有爲名像無有何等盡復名像盡便復思惟案本念有是應意無有識亦無有名像識盡復名像盡便復思惟念是何等無有則識無有何等盡復識盡便復思惟案本念得是應意無有殃種識亦無有殃種已盡則識盡便復思惟念何

等無有爲殃種無有何等盡爲殃種盡便復思惟念本得應意無有癡亦無有殃種癡已盡則殃種盡殃種已盡識盡識盡名像盡名像盡六入盡六入盡更盡更盡痛痒盡痛痒盡愛盡愛盡成就盡成就盡有盡有盡生盡生盡老死盡憂愁苦不可意劇便盡如是最無有量苦陰便盡佛告諸比丘彼時念是以自得故道所佛從是往得便隨已隨便知老死亦知老死習亦知老死滅亦知老死行今度生亦爾有亦爾受亦爾愛亦爾痛痒亦爾

更亦爾六入亦爾名像亦爾識亦爾殃種亦
爾便知癡亦知癡習本亦知癡盡亦知受行
令癡盡譬比丘若人在空澤間閑處行便見
故道故有行者迹人便隨迹已隨迹便見故
城好足園好足饒樹好足池好足河好山壑
亦好處熾饒園樂便念是若我今往當白王
我爲行在空澤間閑處便見故道故人行處
便隨已隨見故城好足園好足饒樹好足池
好足河好山壑亦好處熾饒園樂可王居王
便取居却後稍嚴稍增熾多人饒佛告諸比

丘我亦如是得故道所佛本從是行者我便
隨已隨便知老死從所亦知老死從聚亦知
老死何盡亦知老死何行得度世知生亦爾
知有亦爾知受亦爾知愛亦爾知痛痒亦爾
知更亦爾知六入亦爾知名像亦爾知識亦
爾知作行亦爾知癡亦知癡從生亦知從何
癡滅亦知何行除癡度世佛便告比丘比丘
尼優婆塞優婆夷若比丘爲比丘如有應受
行便得道不失道能巧道比丘尼亦爾優婆
塞亦爾優婆夷亦爾若諦受正行便隨道得

道能如應法行如是無爲行者增多方至天
亦人已見佛說如是誼比丘取著意佛說行
者受

佛說貝多樹下思惟十二因緣經

佛說緣起聖道經

唐三藏法師玄奘奉 詔譯

如是我聞一時薄伽梵在室羅筏國住普多
林給孤獨園與大苾芻衆千二百五十人俱
及諸菩薩摩訶薩等無量大衆爾時世尊告

諸大衆吾未證得三菩提時獨處空閑寂然
宴坐發意思惟甚奇世間沉淪苦海都不覺
知出離之法深可哀愍謂雖有生有老有死
此沒彼生而諸有情不能如實知生老死出
離之法我復思惟由誰有故而老死如是
老死復由何緣我於此事如理思時便生如
是如實現觀由有生故便有老死如是老死
由生爲緣我復思惟由誰有故而得有生如
是生者復由何緣我於此事如理思時便生
如是如實現觀由有有故便得有生如是生